

Podpěruja wólby Serbskeho sejma

Krajne džělowe zjednoćenstwo Serbska Lěwica podpěruje wólby Serbskeho sejma. Nimo toho je dwě wosobje namjetowało, zo byštej za přeni demokratisce legitimowany serbski parlament kandidowało.

Budyšin (SN/at). Na kóncu bě wjetšina dosć jasna, kotraž wupraji so za podpěru wólbow Serbskeho sejma. Do toho pak su wobdžělnicy wčerawšeho zetkanja Serbskeje Lěwicy w Budyšinje wobšěrnje swój wosobinski wid do diskusije dali.

Či jedni maja dale Domowinu za legitimowanu zastupjerku našeho ludu, štož wuchadźa hižo z jeje stawiznow. Druzy su bóle diferencowali: Stawizniski aspekt je jim jedna stronka. Jako dalšu pak skedźbnjach kritisce na skutkowanje třěšneho zwjazka po towaršnostnym přewróće jako towarstwo. Tam njeje so Domowinje poradziło, w bytostnych za narod eksistencielnych prašenjach statnym instancam ze za wohroženu mjeńšinu trěbnej krutosću napřečo stupać.

Najwjace brjušebolenja pak načinja mnohim přitomnym konstrukt tychle wólbow, řeč bě wo „wěcy priwatnikow“. Někotryžkuli čuješe so „nutrkownje pačeny“, kaž Měrcin Bałcar to zwurazni. No-

wy model za zastupowanje zajimow serbskeho ludu je nuznje trěbny. Hdyž pak wólbam njepřihłosuja, dyrbjeli sej serbscy lěwicarjo prašenje lubić dać, čehodla pospyt za nowu kwalitu samopostajowanja sabotěruja. A čehodla so wot duchowneho namrěwstwa Arnošta Barta a Jana Skale wotwobroća. W jeju tradiciji žiwy być wšak rěka być za Serbski sejm.

„Serbski sejm nima wothłosa w serbskim ludze, to pak zaleži na ludze samym“, zwěsći Sieghard Kozel, „pospyt to, wšako pospytać dyrbiš.“ Hajko Kozel pytnje samo lěpšinu za Domowinu: Ze Serbskim sejmom změje wona šansu, so na bazowe džěło koncentrować. Po słowach korěčnicy Serbskeje Lěwicy Hańžki Wjeselic, kotraž je tež w iniciatiwje Serbski sejm aktiwna, jenož „woprawdžity hlós nimamy“, ale „trjebamy šulsku wučbu, hdžež něšto wo serbskich stawiznach zhoniš“. To je młoda studentka hakle na studiju w Lipsku spóznać dyrbjala.

Po wotumje za podpěru wólbow wobkrućichu lěwicarjo Hańžku Wjeselic a Hajka Kozela jako swójskej namjetaj za kandidaturu do Serbskeho sejma. Jako hósć wobdžěleny wólbny nawoda dr. Hagen Domaška je tele wuslědki wčerawšeho zeńdženja z wjeselom přiwzał.